

EVENING GOJRI

NEWS BULLETIN

5 MAY 2025

1700HRS

اونینگ گو جری نیوز بلیٹن مورخہ 5 مئی 2025

یوہ آکا شوانی جموں ہے عیدالرحمان تے نصرت تیں خبر سُنو۔

HEADLINES

- ۱۔ پہلگام دہشت گرد حملہ تیں بعد بھارت نے پاکستان غے خلاف ایک بڑو قدم چاتاں مانہہ دریائے چناب ور بنایا گیا بگلیار ڈیم ور پانی غی روانی نانہہ روک ليو ہے۔
- ۲۔ دفاعی سیکرٹری راجیش کمار سنگھ نے اج نوی دہلی مانہہ وزیر اعظم نریندر مودی غی رہااش گاہ ور اُن نال ملاقات کی۔
- ۳۔ وزیر اعلیٰ عمر عبداللہ نے سول سیکرٹریٹ سرینگر مانہہ منعقد ایک اعلیٰ سطحی میٹنگ غے دوران حالیہ بجٹ منصوبیاں غی عمل آوری ور زور پایو ہے۔
- ۴۔ حفاظتی دستاں نے پونچھ ضلع غا سرنکوٹ علاقہ راجارا مانہہ تلاشی مہیم غے دوران دہشت گرداں غا ایک خوفیہ ٹھکانہ غو پتو لایو ہے۔

CHENAB FLOW STOPPED

پہلگام دہشت گرد حملہ تیں بعد بھارت نے پاکستان غے خلاف ایک بڑو قدم چاتاں مانہہ دریائے چناب ور بنایا گیا بگلیار ڈیم ور پانی غی روانی نانہہ روک ليو ہے آکاشوانی گا نمائندہ نے خبر دتی ہے کہ بھارت نے بگلیار ڈیم ور پاکستان آلے پاسے جان آلا پانی نانہہ روک ليو ہے تے بھارت اپنا اُس فیصلہ ور عمل کر رہیو ہے جس مانہہ دریائے سنگھ تیں پاکستان آلے پاسے جان آلا پانی نانہہ مکمل بند کرن غی گل کہی گئی تھی۔ بھارت دریائے جہلم ور قائم کشن گنگا ڈیم ور وی اسے طرح پانی بند کرن گو منصوبو تیار کر رہیو ہے۔ واضع رہ کہ رام بن ضلع مانہہ بگلیار پن بجلی پروجیکٹ تے شمالی کشمیر مانہہ کشن گنگا پروجیکٹ بھارت نانہہ پاکستان جان آلا پانی نانہہ بند کرن غی صلاحیت مہیا کریں تے بھارت نے ۲۲ اپریل نانہہ پہلگام مانہہ ہویا دہشت گرد حملہ غے دوران ۶۲ افراد غی ہلاکت تیں بعد سندھ آبی معاہدہ نانہہ وی منسوخ کردتو تھو۔

PM DEFENCE SECY

دفاعی سیکرٹری راجیش کمار سنگھ نے اج نوی دہلی مانہہ وزیر اعظم نریندر مودی غی رہااش گاہ ور اُن نال ملاقات کی ہے گزشتہ روز فضائیہ غا چیف ایر چیف مارشل امر پریت سنگھ نے وی وزیر اعظم نال ملاقات کی تھی اس تیں علاوہ بحریہ غا چیف ایڈمرل دنیش کے تریپاٹھی تے فوج غا چیف جنرل اوپندرہ دیودی نال وی وزیر اعظم غی بکھ بکھ میٹنگ ہوی ہے تے یہ تمام میٹنگ پہلگام دہشت گردانہ حملہ غ انتظار مانہہ کی جارہی ہے۔

CM MEETING

وزیر اعلیٰ عمر عبداللہ نے اج اس گل ور زور پایو ہے کہ آئندہ ۶ مہیناں مانہہ سرکار غی طرفوں کیا گیا اقدامات سب نانہہ نظر آنا چاہیے تانجے عوامی خدمات خاطر سرکار غی طرفوں کیا گیا اقدامات واضع ہوجیں وزیر اعلیٰ نے مزید کہیو کہ حکومتی نظام صرف سول سیکرٹریٹ یا سرکاری دفتراں توڑی ہی محدود نہیں رہنو چاہیے موصوف اج سول سیکرٹریٹ سرینگر مانہہ ایک اعلیٰ سطحی جائزہ میٹنگ غے دوران بول رہیا

تھا اُنہاں نے مزید کہیو کہ ترقیاتی کام کاج بجٹ اعلانات غی عمل آوری تے موثر حکومتی نظام سرکار غی ترجیحات مانہ شامل ہے۔

DC JAMMU

ڈپٹی کمشنر جموں سشن کمار ویشیا نے اج گلیاں گا لاوارث بچاں نانہ تعلیممہیا کران آلا ایک سرکاری اسکول مانہ کمپیوٹر تے پرنٹر تقسیم کیا بین اس موقعہ ور بولتا مانہ ڈی سی موصوف نے کہیو کہ بچاں غی تعلیم تے حوصلہ افزائی خاطر ہر ممکن اقدام کیا جارہا ہیں تاکہ بچہ تعلیمی سرگرمیاں مانہ مشغول رہیں اُناں نے مزید کہیو کہ یہ ڈیجیٹل آلہ تعلیمی عملہ تے طالب علم بچاں وستے کافی مفید ثابت وین غا تے اُن غی سیکھن غی صلاحیت مانہ بادو کریں گا موصوف نے مزید کہیو کہ اس سرکاری اسکول غے اندر دیگر بچاں غے نال ۳۸ ایسا بچہ تعلیم حاصل کر رہا ہیں جن نانہ ضلع انتظامیہ نے گلیاں تیں چایو ہے سکولی تعلیم آلے پاسے راغب کیو ہے اس موقعہ ور بولتا واں ڈی سی موصوف نے اس طرح کہیو۔

PM SURYAGHAR

جموں کشمیر غا دور دراز علاقہ مانہ بجلی غی بہتر سہولت واسطے پردھان منتری سورہ گھر مُفت بجلی یوجنہ اہم کردار ادا کر رہی ہے اس سکیم غو مقصد گھراں، مانہ شمسی توانائی غے ذریعے مستقل تے صاف بجلی فراہم کرنو ہے شمسی پینل لگن تیں بعد مقامی لوکاں نانہ بلا رُکاوٹ بجلی دستیاب ہو رہی ہے۔ اس سلسلہ مانہ گل کرتا واں ایک مُستفید نے اس طرح کہیو۔

HIDEOUT BUSTED POONCH

حفاظتی دستاں نے پونچھ ضلع غا سُرُنکوٹ علاقہ راجارا مانہ تلاشی مہیم غے دوران دہشت گرداں غا ایک خوفیہ ٹھکانہ غو پتو لایو ہے مخصوص اطلاع ور پولیس نے فوج نے مل غے مرہوٹ علاقہ مانہ کاروائی کی اس دوران جنگی سازوسامان برآمد ہوو مارا نما بندہ غی رپوٹ غے مطابق برآمدات مانہ سٹیل غی پالٹیاں مانہ ۲ ای ای ڈی تے ٹیفین مانہ ۳ ای ای ڈی ۵ مشتبہ یوریا غا پیکٹ ایک گیس سیلنڈر دوربین تے دو چھوٹا وائر لیس سیٹ ایڈیشنل ایس پی پونچھ ماہن شرما نے اس برآمدگی غی تصدیق کی تے کہیو یاہ کاروائی علاقہ مانہ ممکنہ دہشت گردانہ سرگرمیاں نانہ روکن مانہ مدد دے گی۔

HADP FARMER

جامع زرعی ترقیاتی پروگرام غے تحت جموں کشمیر غا کسان جدید تے پائیدار طریقہ اپنا رہا ہیں تانجے پیداوار تے آمدنی مانہ اضافو وے سانہ ضلع غا رام گڑھ تیں تعلق رکھن آلو ایک کسان نے قدرتی طریقہ سنگ بیج تیں بغیر کھیرانانہ آگانو شروع کیو ہے۔ اس قدم تیاں نہ صرف آمدنی بدھی ہے بلکہ ماحول دوست کھیتی نانہ وی فروغ لیو ہے اس سلسلہ مانہ گل کرتا واں ایک کسان نے اس طرح کہیو۔

YOGA SAMBA

بین الاقوانی یوگا تہاڑا ۵۲۰۲ غی پُر جوش شروعات غا طور ور ضلع کمشنر سانہ راجیش شرما تے جموں کشمیر آیوش گا ڈائریکٹر نے بی بی این انسچیوٹ سانہ مانہ ایک زبردست یوگا سیمینار غی قیادت کی جس مانہ ۰۰۱۱ تیں زیادہ یوگا غا شوقین افراد نے حصو لیو۔ اس پروگرام غو مقصد نوجوانان غے اندر صحت مند طرز زندگی نانہ فروغ دینو تھو۔ اس قدم غو مقصد جسمانی تے زہنی صحت غا بارا مانہ آگاہی پیدا کرنو تھو۔ تے یوگا

مشق غے ذریعے برادری مانہ ہم آہنگی نانہ فروغ دینو تھو۔

SPORTS DODA

ضلع ٹوڈہ مانہہ نوجوان خدمات تے کھیڈ محکمہ غی طرفوں زونل سطح ور ۲ روزہ کھیڈ مقابلہ غی شروعات کی گئی ہے ان کھیڈ مقابلہ مانہہ ۴۱ سال تک غی لڑکی حصو لین غی اس کھیڈ تقریب غی پہلے تہاڑے اج بکھ بکھ اسکولان غی طالب علمان نے والی بال کرکٹ تے دوجی کھیڈان مانہہ حصو لیو کھیڈان مانہہ حصو لین آلی خواتین کھلاڑیاں نے اس طرز غا کھیڈ مقابلہ منعقد کران ور نوجوان خدمات تے کھیڈ محکمہ غو شکریو ادا کیو اس دوران اپنی کوشی گو اظہار کرتا مانہہ ان کھیڈان مانہہ حصو لین آلی ایک کھیڈاری نے اس طرح کہیو۔

GYANPATH DESIGN

غا تعاون تیں گیان پتہ ور نقشہ بنان MYGOV.IN یوم آزادی ۵۲۰۲ غی تقریبات غا سلسلہ مانہہ وزارت دفاع تے غو مقابلو منعقد کیو جارہیو ہے۔ یوہ مقابلو ایک مئی تیں ۵۱ مئی توڑی جاری رہ غو۔ اس مقابلہ گو مقصد نوجوانان تے عوام مانہہ خُب الوطنی گا جزیہ نانہہ پیدا کرنو ہے۔ شرکاء نانہہ لال قلعه مانہہ این سی سی کیڈٹس این ایس ایس رضاکاران تے سکول غا بچان غے زریعے ایسو نقشو یا خاکو بنانو چاہیے جس ور بچہ عمل کریں۔ پہلا ترے جتن آلاں نانہہ ۰۱ ہزار روپیہ دتا جیں غا۔ ۰۵۲ بہترین شرکاء نانہہ یوم آزادی غی تقریب واسطے دعوت نامو لبے غو۔ شرکاء نانہہ درست ایمیل تے موبال نمبر دینا ویں گا تے ڈیزائن مائی گوو غی ہدایت غے مطابق ہونا چاہیے۔

KISHTWAR PBLIC DARBAR

عوامی خدمات غی بہتر فراہمی خاطر ڈپٹی کمشنر کشتواڑ راجیش کمار شون نے بلاک دچھن مانہہ عوامی کیمپ غو انعقاد کیو جس دوران مقامی افراد نے اپنا معاملات تے ترقیاتی خدشات موصوف غے سامنے رکھیا اس دوران ڈی سی موصوف نے سڑک پانی سپلائی تعلیم تے روزگار محکمان غا حکام نانہہ ہدایت جاری کی تے کہیو کہ جے کے سمدھان نشہ مُکت بھارت تے مشن یووا جیسی سکیمان ور عمل آوری موجودہ وقت غی اہم ضرورت ہے اس کیمپ غے دوران بیٹی بچاؤ بیٹی پڑھاؤ اسکیم غے تحت چھوٹا بچان وستے بیبی کیر کٹ وی تقسیم کی گئی اس تیں علاوہ بٹر تعلیم تے امداد فراہمی ور وی تبادلہ خیال کیو گیو اس موقعہ ور ڈی سی موصوف غے ہمراہ اے ڈی سی تے ایس ڈی ایم تیں علاوہ کئی دیگر اعلیٰ حکام وی موجود تھا۔
